

Pa Augustus 1989

Instituto Pedagogico nobo mester reemplaza APA

ORANJESTAD(AAN) -- Durante un conferencia di prensa Ministro Croes a presenta na prensa e plannan pa restructuracion di enseñanza.

E plannan aki ta formula den tres nota di maneho. Na prome lugha ta "Renovacion di enseñanza. Prioridad pa futuro".

Segun Ministro Croes, e nota aki ta esun principal. E ta cubri henter e sistema di enseñanza. Den liñanan grandi e nota aki ta señala e fayonan den e sistema actual y ta propone plannan y accionnan cu tin prioridad pa renovacion di e sistema di enseñanza.

E metanan principal di e sistema di enseñanza den futuro lo mester ta:

- Un sistema di enseñanza democratico cu lo haci posibel pa tur mucha y hende grandi na Aruba, por haya e enseñanza cu e tin mester pa e yega na desaroya su mes miho posibel como hende, den sentido social, profesional, fisico, emocional, creativo, etc.

- Un sistema di enseñanza den cual e loke hende siña lo mester ta revelante pa e persona y pa su comunidad.

- Un sistema di enseñanza lo acentua e creatividad y sentido critico di tur den enseñanza.

- Esaki ta significa cu e sistema di futuro lo mester ta un sistema caracteriza pa un maximo na flexibilidad y un minino na rigidez; un maximo na diversidad relevante sin ningun forma di discriminacion o exclusion.

Como terenonan di prioridad a formula plannan pa e renovacion di e formacion di maestronan di school. E nota aki yama "E instituto pedagogico" cu ta e prome cu lo worde discuti y poni den ehecucion.

Segun Ministro Croes mester cuminza cu un instituto nobo pa formacion di maestro di school na Augustus 1989.

E instituto nobo aki lo tin diferente funcion ariba tereno di enseñanza relaciona cu maestronan di school. Akinan lo prepara hobennan pa bira

maestro di school, lo capacita maestronan cu ya ta trahando, lo haci investigacion y lo traha na plannan pa enseñanza mes.

E instituto aki tambe lo tin e funcion di un "teacher's center" caminda maestronan di school lo por bin hunto pa traha hunto y bao guia soluciona problemanan cu nan topa na school.

Segun Ministro Croes, Unesco tambe ta evaluando e nota aki pa duna su opinion.

E otro tereno di prioridad den renovacion di enseñanza ta idioma di instruccion den enseñanza. Ta un hecho segun Ministro Croes cu e uzo di

idiomanan den nos comunidad a cambia y esaki a afecta tambe enseñanza.

Realidad ta cu nos comunidad ta uno multilingual. Esta un comunidad den cual diferente idioma, papiamento, spaño, ingles y hulandes ta worde usa cu diferente frecuencia.

Den enseñanza segun Ministro Croes sinembargo no ta tene cuenta cu esaki. Den e nota bon argumenta y bon balanza yama: "Pa un sistema di enseñanza bilingual na Aruba", un grupo di experto di Departamento di Enseñanza ta

presenta un plan global pa yega na soluciona nos problema di idioma den enseñanza.

E tres notanan aki segun Ministro Croes mester worde mira como un totalidad. E notanan tocante di e instituto pedagogico y esun tocante enseñanza bilingual, ta dos topico di e nota di maneho integral, cu a worde elabora caba. Otro topiconan lo sigui despues.

E notanan aki ta worde manda pa tur instancia relevante of cu ta interesa cu e intencion pa discuti e plannan presenta prome cu cuminsa cu nan ehecucion.